

# AL È NASSÛT IL TEATRI STABIL FURLAN

Firmât l'at di costituzion dal gnûf sogjet che al à l'obietîf di rilancjâ il teatri di cualitât in lenghe furlane

«Il Teatri Stabil Furlan al sarà in curt une realtât e la ARLeF - Agenzie Regionâl pe Lenghe Furlane lu sosten cun convinzion, parcè che e je une iniziative che pe prime volte e met a sisteme sogjets impuartants che a operin tal mont dal teatri e de culture in Friûl. L'obietîf al è chel di lavorâ cun professionalitât sul teritori, valorizant i tancj artiscj, interpretis, autôrs e operadôrs teatrâi dal Friûl, indreçantsi a di un public no dome furlanofon e costruint relations cun altris istituzions statâls e internazionâls», al dîs il president Eros Cisilino.

Al progjet, che al viôt tant che ent promotôr il Comun di Udin, al aderis cualchidun tra i sogjets plui impuartants che a operin intal setôr dal teatri e de valorizazion de lenghe furlane. Di là de ARLeF, a fasin part di cheste gnove iniziative la Societât Filologjiche Furlane, l'Istitût Ladin Furlan, la Academie "Nico Pepe", il CSS e la Fondazione "Teatro Nuovo Giovanni da Udine", che e ospitarà la sede. Il program al previôt che dentri dal 2021 il Teatri Stabil Furlan al otegni il ricognissiment



I rapresentants dai Ents dopo de firme dal at

ministeriâl e i fonts che a coventin, jentrant cussî intal sisteme teatrâl talian tant che imprese di produzion.

“Ce che si vûl fâ – al rimarche Cisilino – al è di dâi vite a une struture inovative, lizere inte sô operativitât gjestionâl, cuntun progjet culturâl di cualitât e soredut originâl, intal sisteme teatrâl plui ampli regionâl e nazionâl. Un progjet che al cjate la sô fonde inte unicitât culturâl dal nestri teritori, mosaic di lenghis e di popui, e che al dopre la lenghe furlane par contribuî ae varietât straordenarie de propueste culturâl europeane. Une iniziative che e mancjave e che, propit pes motivazions ilustradis, e va intindude tant che un investiment che al permetarà di puartâ in Friûl gnovis risorsis economicis midiant di fonts europeans, di fonts ministeriâi (Fus), di coproduzions e de vendite di spetacui”.

I prins laboratoris di dramaturgjie, intant, si inviaran za cheste Sierade, come ancje cualchi iniziative dedicate

al teme dal “Teatri des lenghis”.

“Cheste iniziative – al conclût Cisilino – e permetarà finalmenti di metisi in linie cui standards europeans in teme di tutele des lenghis minoritariis. Lassant i câs ben cognossûts dal sloven e dal sudtirolês in Italie, al bastè pensâ, par esempli, al Gales, cul “Theatr Genedlaethol Cymru” – il Teatri in lenghe galese – fondât intal 2003; ae Catalogne, cul “Teatro Nacional de Catalunya”, fondât intal 1996, e al País basc che intal 1993 al à costituît un organisim di pueste clamât “Sarea”, la rêt basche dai teatris. E cence calculâ che in Galizie si è lâts inmò plui inlâ, cu la istituzion – intal 2008 – di une agenzie regionâl di pueste che e promôf e che e consolide dut il tiessût imprenditoriâl intal setôr culturâl galizian”.

Pagine par cure de ARLeF - Agenzie Regionâl pe Lenghe Furlane



*un'Emozione...*

*i Fiori della Coop*



addobbi per **cerimonie, matrimoni e banchetti** studiati nei minimi particolari. Idee originali per composizioni di **fiori artificiali, mazzi particolari, Bouquet** e piante di ogni genere.

Via Fiore dei Liberi, 32 - Premariacco (UD) - Tel. 0432.729005 • SABATO APERTO 8.30-12.30 • 15-19